

Laaft ihr Gail!

Bin isch doch omm Somsdaachmoie omm Moo spazierngonge unn habb su vor misch hie gedenkt, wie schnell doch die Zeit vergieht, weil schunn iss die Fassenacht erum. Awwer **monscher** vunn uns hott noch enn raue Hals, **weiler** dissjohr wie aach sunnst onn Fassenacht beim Gugge vumm **Fassenachtszuuch** alls „Hall die Gail“ gerufe hott, weil dess schunn ewisch unn drei Daach unsern Schlachtruf uff de Gass iss.

Omm Gänskippel habb isch moin Kumbel Schorsch **getroffe**, der doo **unne** ebbes ze **erledische** hadd, unn gleich noochdem er **Gude** gesaad hott, hodder vunn dere Sach mettem **Gailsflaasch**, also mettem Pferdefleisch, oogefonge: Honnes, was **dusden** vunn su ebbes halle?

Isch saach: Isch wusst garnitt, **dasses** su vill Gail gewwe **dut**, die merr schlachte **konn**. Habb isch doch **gelese**, dass e Firma in Rumänien in emm **halwe** Johr 750 Tonne von su emm Flaasch nooch Fronkreisch **gelifferd** hott, dass dort e **onner** Firma dess zum **Rindflaasch umgedaafd** unn dess onn enn Hersteller ferr Tiefkühlsache **verkaafd** hott. Unn jetz isses in dem **soine** Sache **droi**, ohne **dasses** uff de Packung **stieht**, uff fast drei Millione **Packunge**, stell derr mol vor! – unn **unserooner** duts esse.

No ja, **moont** de Schorsch, moin Unkel Pitter hott **frieher** immer widder emol in Rissels-em beim Mezzjer Schildge Gailsflaasch **gehollt**, dess **sollem** aach geschmeggd hawwe. Awwer bei uns dehoom **hotts** koo Gailsflaasch gewwe, unn bei de Nachberschoft hott merr, su vill isch waaß, aach koons gesse.

Isch druff: Isch waaß aach **wessweesche**. Wie moin Vadder e Kind gewese iss hott merr emm verzählt, bei jedem Gaul deet de Urin **dorschs** gonse Flaasch dorsch laafe unn **dessweesche wärs eklisch** dess ze esse, ess deet aach **doodenooch** schmegge. Unn genau dess hott moin Vadder mir verzählt unn su habb aach **ischs** nitt gesse.

No ja, seet de Schorsch, dess waaß merr heit besser. Unn dess Gailsflaasch wär aach gesund, ess hädd wenisch Fett, vill Eise unn vill Vitamine. Awwer dess iss merr egal, weil isch **wills** nitt esse unn su vill isch waaß habb **ischs** aach noch nitt gesse.

Isch saach: Villeischd doch. Awwer jetz werdd joo iwverall **noochgeguggd**, in was ferr **Ferdischerische** Gailsflaasch **droi** iss. Ess hott sisch aach **erausgestellt**, dass in dem Flaasch su Medikamente droi sinn, die den, **ders** esse **dut**, kronk mache kenne. Jetz werdd halt geschennd, weil nitt alles kontrolliert worrn iss, awwer bei su vill **Umweesche**, die dess Flaasch gemacht hott, **wars** sicher schwer su ebbes **erauszeffinne**.

Unn, **frächt** de Schorsch, solle merr jetz nix Ferdisches mieh kaafe? Soll isch moin Rase **umgrawe** unn dort nor noch Gemies wachse losse? Unn solle merr widder Karniggel großzieh? Merr muss sisch doch uff was **verlosse** kenne. Awwer nor uff oons **konn** merr sisch halt verlosse, **dasses** immer Mensche gewwe **dut**, denes gons egal iss, was mett onnern Leit bassierd, ob **se Gammelflaasch** odder Gailsflaasch mett **Arzenei** esse, **Haupsach**, sie mache ihrn Rebbach.

Isch habb gegrinst. Mir werrn uns was oifalle losse misse unn onn Fassenacht nimmi „Hall die Gail“ rufe, weil wenn die Gail **stieh** bleiwe kann merr **se schnabbe** unn schlachte.

Jetz hott aach de Schorsch gegrinst. Also misse merr **nächstjohr** rufe: „Laaft ihr Gail!“, dess **heeft**: „Macht eich fort, sunnst **werrder geschlacht!**“

Isch saach: Rischdisch. Awwer dass dess „Laaft ihr Gail!“ unsern „Schlachtruf“ iss, dess saache merr omm bessde aach nimmi, gelle? Eiern Honnes